

Faafinta Rasmiga ah  
الرسمية الرسالة  
Official Bulletin



EE JAMHUURIYADDA SOOMAALIYA

Sanadka 10aad

Muqdisho, 31 Maارso 2023

Lr. 1

Waaxda Maamulka Faafinta Rasmiga ah  
Ee Xafiiska Garyaqaanka Guud ee Dawladda

**FAAFIN BILAHA SOO BAXAY**

Qiimaha waa \$XXX Dollar, lambar waliba – **RUKUNKA:** Sanaddii waa \$XXX Dollar, Soomaaliya gudaheeda – Dibaddeedana waa \$XXX Dollar.

Rukunka la weydiisto waqtiga loo gooyay wuxuu ka bilaabmaa 1 Janaayo. Qiimaha Qoritaanku F.R halkii sadar iyo wixii ka yar waa \$XXX Dollar – Rukunka iyo Qoritaanku waxaa la weydiistaa Laanta Maamulka Faafinta Rasmiga ah – Lacagta waxaa lagu bixiniyaa Xafiiska Canshuuraha ee Wasaaradda Maaliyadda.

**KOBNIIN**

**BOGGA KOOWAAD**

**SHARCI**

W.M

**BOGGA LABAAD**

XEER

**BOGGA SEDDEXAAD**

**TALOOYIN, ISGAARSIIN, OGAYSIIS, IWM**

**BILAHA**

**JANUARY, FEBRUARY, MAARSO**

**2023**



FEDERAL REPUBLIC OF SOMALIA  
OFFICE OF THE PRESIDENT

SHARCI LR.009

Taariikh: 20 Maars 2023

OGOLAANSHO ANSIXINTA HINDISE SHARCIYEEDKA AQOONSIGA IYO  
DIIWAANGELINTA DADWEYNNAHA

MADAXWEYNNAHA J.F.S.,

- MARKUU ARKAY:** Qodobka 87<sup>aad</sup>, Faqradda 1<sup>aad</sup> iyo Faqradda 2<sup>aad</sup> iyo 85<sup>aad</sup> ee Dastuurka KMG.
- MARKUU ARKAY:** Qodobka 90<sup>aad</sup>, Xarafka "F" ee Dastuurka KMG.
- MARKUU ARKAY:** Warqadda Gudoomiyaha Golaha Shacabka XGGSH/0240/B11/23, ku taariikheysan 14/03/2023, kuna saabsan Soo Gudbin Hindise Sharciyedka Aqoonsiga iyo Diiwaangelinta Dadweynaha.
- MARKUU TIXGELIYAY:** Baahida loo qabo in la ansixiyo lana meel-mariyo Sharcigan.

**Waxa uu Madaxweynuhu soo saaray sharcigan:**

**Qodobka 1<sup>aad</sup>**

Laga billaabo marka uu Madaxweynuhu saxiyo Sharcigan, waxa si rasmi ah loo oggolaaday Sharciga Aqoonsiga iyo Diiwaangelinta Dadweynaha.

**Qodobka 2<sup>aad</sup>**

Marka uu Madaxweynaha J.F.S. saxiyo Sharcigan, waxa lagu soo daabici doonaa Faafinta Rasmiga ah ee Jamhuuriyadda Federaalka Soomaaliya.

JAMHUIRIYADDA FEDERAALKA SOOMAALIYA
XAFIISKA HANTIDHAWRKA GUUD
DIWAAN NO: <u>HAN-029-23</u>
TAARIKH: <u>26-03-2023</u>
SAXIIX: _____
HANTIDHAWRAHA GUUD
AVV. Ahmed Isse Gutale



**Madaxweynaha J. F. S.**

**Mudane Dr. Xasan Sheekh Maxamuud**



**JAMHURIYADDA FEDERAALKA  
SOOMAALIYA**

**HINDISE SHARCIYEEDKA AQOONSIGA  
IYO DIIWAANGELINTA DADWEYNAHA**



**Cutubka 1aad:**  
**Qodobbo Aasaasi Ah**  
**Qodobka 1aad:**  
**Magaca Sharciga**

Sharcigan waxaa lagu magacaabaa Sharciga Aqoonsiga iyo Diiwaangelinta Dadweynaha.

**Qodobka 2aad:**  
**Ujeeddooyinka Sharciga**

Sharcigan wuxuu suurtagelinaya ujeeddooyinka soo socda:

- 1) In la hirgeliyo hannaanka diiwaangelinta iyo aqoonsiga muwaadiniinta Jamhuuriyadda Federaalka Soomaaliya oo si sharci ah u caddaynaya aqoonsiga muwaadinka una fududeynaya helidda dhammaan adeegyada uu u baahan yahay iyo xuquuqda sharcigu u oggolyahay;
- 2) In la taabo-geliyo hawla aqoonsiga iyo diiwaangelinta dadweynaha iyadoo la abuurayo hay'ad qaran oo fulisa howlaha iyo waajibaadka uu sharcigu u igmaday.
- 3) In lagu bixiyo Tirsii Aqoonsi gaar ah kaas oo lagu aqoonsanayo qofka haysta tirsigaas;
- 4) In la abuuro nidaam aqoonsi oo leh astaamo amni lagu xaqiijin karo aqoonsiga qofka si loo fududeeyo in dhammaan adeeg-bixiyaashu (hey'daha dowliga iyo kuwa gaarka loo leeyahay) ay si kalsooni leh ula macaamilaan qofka sita aqoonsigaas iyaga oo ku kalsoon in qofkaasi uu yahay cidda uu sheeganayo;
- 5) In Jamhuuriyadda Federaalka Soomaaliya ay yeelato nidaam aqoonsi oo la mid ah nidaamyada caalamiga ah.
- 6) In nidaamka aqoonsiga Dalka ku dhismo si sifo sharci oo ka jawaabaysa baahida aqoonsi ee dadweynaha ku nool Jamhuuriyadda Federaalka Soomaaliya kuwaas oo u baahan in ay helaan adeegyada aqoonsi ee u fududeyn lahaa macaamilkooda dhaqaale iyo xiriirradooda gudaha iyo dibeddaba.

**Qodobka 3aad:**  
**Eray-bixin**

Haddii aan si kale loogu sheegin sharciga gudihiisa, ereyada hoos ku qoran mid waliba wuxuu leeyahay macnaha ku hor qoran:

- 1) **“Sugid”** Waxaa loola jeedaa hab lagu xaqiijinayo in qofku yahay ruuxa uu sheeganayo;
- 2) **“Hay’adda”** Waxaa loola jeedaa Hay’adda Aqoonsiga iyo Diiwaangelinta Qaranka - (National Identification and Registration Authority – NIRA) ee lagu asaasay Sharcigan;



- 3) “**Xog-dhalyada**” (biometric) Waxaa loola jeedaa tilmaamaha la xiriira waxyaabaha u goonnida ah qofka ee ka turjumaya qaybo ka mid ah jirkiisa sida faraha, midabka indhaha, muuqaalka wejiga, iyo qaar kale;
- 4) “**Warqadda Dhalasho**” Waxaa loola jeedaa caddaynta la siiyo qofka u dhashay Soomaaliya;
- 5) “**Golaha Wasiirrada**” Waxaa loola jeeda Xukuumadda Federaalka Soomaaliya oo ah hey'adda ugu sarraya Laanta Fulinta ee Dowladda si waafaqsan Qodobka 97aad ee Dastuurka Ku-meel gaarka ah ee Jamhuuriyadda Federaalka Soomaaliya;
- 6) “**Xarunta Xog-kaydinta**” Waxaa loola jeedaa barta lagu uruurinayo xogta ay Hay'addu hayso;
- 7) “**Maareeye Guud**” Waxaa loola jeedaa Maareeyaha Guud ee Hay'adda;
- 8) “**Abtirsii**” Waxaa loola jeedaa xiriirka ka dhexeeya xubnaha qoys la diiwaan-geliyey sida waalidka iyo carruurtooda;
- 9) “**Habka Aqoonsashada Asaasiga**” Waxaa loola jeedaa hab qofka lagu aqoonsanayo oo loo abuuray inuu dadka u siiyo aqoonsasho loo adeegsado maamulka iyo macaamilka uu qofku la yeesho hey'daha dowliga ah iyo kuwa gaarka loo leeyahay;
- 10) “**Aqoonsasho**” Waxaa loola jeedaa hannaanka lagu hubinayo, lagu aqoonsanayo lagaga go'aan-gaarayo qofka uu yahay;
- 11) “**Kaar-aqoonsi**” Waxaa loola jeedaa kaarka aqoonsiga Qaranka ee ay Hay'addu si midaysan uga bixiso dalka oo dhan;
- 12) “**Wasiirka**” Waxaa loola jeedaa Wasiirka Wasaaradda Arrimaha Gudaha, Federaalka iyo Dib-u-heshiisiinta;
- 13) “**Wasaaradda**” Waxaa loola jeedaa Wasaaradda Arrimaha Gudaha, Federaalka iyo Dib-u-heshiisiinta;
- 14) “**Xog-horaadda**” Waxaa loola jeedaa macluumaadka laga diiwan-gelinayo qof walba sida magaca qofka, magaca aabbaha, magaca hooyada iyo taariikhda dhalashada;
- 15) “**Diiwaangelin**” Waxaa loola jeedaa xogta qofka oo lagu diiwaangeliyo si sharciga waafaqsan;
- 16) “**Nidaam**” Waxaa loola jeedaa habka aqoonsashada asaasiga ah;
- 17) “**Tirsii Aqoonsi**” Waxaa loola jeeda lambar aan taxane aheyn oo hal mar la isticmaalayo una goonni ah hal qof kaas oo qofka leh tilmaan soocaysa inta uu nool yahay iyo marka uu dhinto kadib.

**Qodobka 4aad:**  
**Xaqa Helidda Aqoonsiga**

- 1) Muwaadiniinta Jamhuuriyadda Federaalka Soomaaliya iyo qof walba oo si shari ah u degan dalka marka laga reebo kuwa ku jooga booqashada gaaban



waxay xaq u leeyihiin in la diinwaangeliyo lana siiyo aqoonsi iyo dokumintiyada kale laguna kala duwayo habraaca iyo nooca aqoonsiga.

- 2) Wasiirka, isagoo tixgelinaya talo-bixinta Hay'adda, wuxuu soo saarayaas Xeer-nidaamiye faahfaahinaya hannaanka fulinta diiwaangelinta Aqoonsiga Qaranka.

#### **Qodobka 5aad:**

#### **Habraaca Sugidda Qofka**

- 1) Qof walba oo qaadanaya kaarka aqoonsiga waa in la sugi karaa isaga oo la imaanaya dukumiinti ama wax u dhigma oo caddeynaya qofnimadiisa.
- 2) Shuruudaha diiwaangelintu waa inay fududaadaan una oggolaadaan dadweynaha in ay helaan adeegyada aqoonsi ee ay u baahan yihiin.

#### **Qodobka 6aad:**

#### **Bixinta Kaarka Aqoonsiga**

Bixinta Tirsiga, Daabacista Kaarka Aqoonsiga iyo adeegyada aqoonsi ee kale waxaa khidmadda lagu jaangoynayaa xeer-nidaamiye uu soo saarayo Wasiirku.

#### **Qodobka 7aad:**

#### **Maareynta Cabashooyinka**

- 1) Hay'addu waxay hirgalinaysaa nidaam lagu maareeyo cabashooyinka iyo tabashada ka timaada helidda iyo isticmaalka kaarka aqoonsiga kaasoo yeelan doona heerar kala duwan.
- 2) Hay'addu waxay soo saari doontaa Habraaca Xallinta Cabashooyinka oo loo hirgalin doono hab casriyaysan.
- 3) Cabashooyinka muwaadiniinta ee hay'addu u xalin weydo sidii la rabey ama lagu xallin waayey muddada ku xusan Xeer-hoosaadka, waxa ay u gudbeysaa Wasiirka.
- 4) Go'aanka kama dambaysta ah ee Wasiirka ee ku saabsan cabashada laga soo qaatay Hay'adda waxaa looga dacwoon karaa Maxkamadda awoodda u leh.

#### **Qodobka 8aad:**

#### **Xogta La Diiwaangelinayo**

- 1) Lama uruurin karo xog xasaasi ah oo keeni karta in qofka la takooro ama la faquuqo.
- 2) Xogta la diiwaangeliyay looma isticmaali karo ujeedooyin ka baxsan ujeeddada loo qabtay marka laga reebo inta sharcigu oggol yahay.
- 3) Xogta la diiwaangelinayo waa in ay ku koobnaato waxyaabaha soo socda:
  - a) Magaca qofka oo la xeriyo magaca aabaha iyo kan awoowaha, ama magaca qoyska oo afaran.
  - b) Lama diidi karo Magacyada , sida Xaaji, Suldaan, Shiikh, Ugaas, Shariif, Garaad, Macallim iwm.



- c) Magaca hooyada (oo saddexan);
  - d) Taariikhda uu qofku dhashay (maalinta,bisha iyo sannadka);
  - e) Goobta uu ku dhashay (Degmada, Gobolka, Waddanka);
  - f) Deegaanka uu deggan yahay;
  - g) Jinsiga (dhedig ama lab);
  - h) Sawirka qofka (teesare);
  - i) Raadka faraha (10ka farood) iyo/ama sumadda indhaha (IRIS);
  - j) Lambarka telefoonka iyo/ama “emailka” qofka;
  - k) Xaaladda sharci (Muwaadin, Qaxooti,iwm.)
  - l) Xogta sugidda aqoonsiga qofka ee ku soo baxay dukumiinti.
- 4) Xogta la ururiyay waxa lagu keydinaya xarun ta xog-dhiggista Hay’adda.

**Cutubka 2aad:**  
**Dhismaha Hay’adda**  
**Qodobka 9aad:**  
**Asaasid**

- 1) Waxaa Sharcigan lagu asaasay “Hay’adda Aqoonsiga iyo Diiwaangelinta Qaranka”.
- 2) Hay’addu waxay leedahay shakhsiyad qaunuuni ah oo ay ku maareyso arrimaheeda.
- 3) Xarunta Dhexe ee Hay’addu waa Caasimadda Soomaaliya ee Muqdisho waxayna laamo ku yeelanaysaa magaalooyinka waaweyn ee dalka iyo hadba meeshii kale ee ay u baahato.
- 4) Wasiirku, isagoo tixgelinaya tala-bixinta hay’adda, wuxuu go’aan maamul ku soo saarayaa astaanta ay yeelanayso Hay’adda.

**Qodobka 10aad:**  
**Ujeeddooyinka Hay’adda**

Ujeeddooyinka loo asaasay Hay’adda waxaa ka mid ah:

- 1) In muwaaddiniinta ay noqdaan dad la aqoonsan karo oo dukumiintiga aqoonsiga ay sitaan iyo tirsiga aqoonsi ee u goonida ah uu noqdo mid sahlaya adeegyada ay u baahan yihiin;
- 2) Inay xoojiso isku-dubbaridka iyo wax-wada-qabadka shaqooyinka hay’adaha Dawladda iyo kuwa gaarka loo leeyahay ee bixiya adeegyada ay aqoonsashada qofku muhiimka u tahay iyo isku xirka adeegyada dowladda qaab elektaroonik ah.
- 3) In ay abuurto, kuna heysa xogta aqoonsiga xarunta xog-dhigista ee hay’adda taasoo keydinaysa dhammaan xogaha dadweynaha ee muhiimka u ah dawladda;



- 4) Inay gacan ka geysato koboca dhaqaalahaa Qaranka, horumarinta fursado dhaqaale, ka-hortagga is-dulbuurad dhanka adeeg-bixinta iyo ku-xadgudub xuquuqaha aadamiga oo ka dhalan kara aqoonsasho la'aan.

**Cutubka 3aad:**

**Hawlaha , Awoodaha, Iyo Qaab-Dhismeedka Hay'adda**

**Qodobka 11aad:**

**Hawlaha Hay'adda**

Hay'addu waxay qabanaysaa hawlahan soo socda:

- 1) Inay abuurto, ka shaqaysiiso, maamusho oo ay dhawrto nidaam maarayn aqoonsi oo asaasi ah, si ay u suurta-gasho in qof kasta oo muwaaddin ah ama si sharci ah ugu nool Soomaaliya la diwaangeliyo;
- 2) In mawaaddiniinta ku diwaangeliso nidaamka ayna siiso tirsi aqoonsi oo u gooni ah oo lagu aqoonsan karo;
- 3) Inay bixiso kaar aqoonsi ee heer Qaran;
- 4) In ay mas'uul ka tahay barnaamijyo lagu hormaarinyo adeegyada la xiriira diiwaangelinta iyo keydinta xogta aqoonsiga dadweynaha oo ay kala shaqaynayo wasaaradda sidii loo maarayn lahaa nidaamyada elektaroonigga ah ee diiwaangelinta iyo maamulka xogdhigista ay ku kaydinayso diiwaangelinta xogta aqoonsiga dadweynaha;
- 5) In ay hirgeliso tababarada nidaamka diiwaangelinta madaniga ah iyo qorshayaasha taakulaynta farsamo;
- 6) Inay shakhsiyadka siiso xogta la xiriira xaaladdooda diiwaan-gelineed;
- 7) In ay hubiso dhawrsoonaanta xog-dhalyada iyo xog-horaadda shakhsiyadka ee ay Hay'addu ururisay, una maarayso si xilkasnimo leh oo waafaqsan Sharciga;
- 8) In ay qaab elektaroonik ah isugu xirto xarunta xog-dhigista iyo hay'adaha Dawladda iyo kuwa aan dawliga ahayn ee bixiya adeegyada uu aqoonsigu muhiimka u yahay, taas oo loo marayo habraacyo;
- 9) Inay cilmi-baaris ku samayso sida ugu waxtarka roon iyo waxyabaha guud ee ku soo kordha sida loo maareeyo aqoonsiyada hay'adaha kale ee Dawladda iyo kuwa aan dawliga ahayn, isla markaasna ay la wadaagto xogta ama waayo aragnimada la xiriira aqoonsashada;
- 10) Inay si wax-ku-ool ah isugu duwdo, tayo ahaanna u chisto laamaha ay Hay'addu ka furato dalka;
- 11) Si loo hormariyo mudnaanshaha siyaasadda, dhaqaale, bulsho iyo amni ee dalka; iyo
- 12) Inay fuliso, hadba inta sharcigu u oggolanaayo, wixii hawl kale ah oo muhiim u ah ama ku habboon gudashada waajibaadkeeda.



**Qodobka 12aad:**  
**Wadashaqeynta iyo Iskaashiga**

- 1) Hirgelinta sharcigan waxay Hay'addu iskaashi kala yeelanaysaa Wasaaradaha, Waaxyaha iyo Hay'adaha kale ee Dawladda.
- 2) Dhammaan Hay'adaha gaarka loo leeyahay, waxaa waajib ku ah in ay Hey'adda kala shaqeeyaan fulinta howlaheeda si waafaqsan sharcigan.
- 3) Dhammaan muwaaddiniinta Jamhuuriyadda Federaalka Soomaaliya waxaa waajib ku ah in ay is diiwan-geliyaan, qaataanna tirsiga gooni u ah.

**Qodobka 13aad:**  
**Awoodaha Hay'adda**

- 1) Hay'addu, iyadoo aan dhaafayn xeyndaabka Sharcigu xadeeyey, waxay awood u leedahay wax kasta oo daruuri u ah ama ku habboon sidii ay u gudan lahayd hawlaheeda.
- 2) Iyadoon la xadayneyn sida guud ee faqradda hore u dhigan tahay iyo awoodaha ka ratibmaya in Hay'addu leedahay shakhsiyad qaanuuni ah, Hay'addu waxay si gaar ah awood ugu leedahay:
  - a. In ay dacwad soo oogi karto, laguna soo oogi karo;
  - b. In ay geli karto heshiisyada la xiriira shaqadeeda;
  - c. Inay iibsan karto, haysan karto ama iska iibin karto hantideeda si waafaqsan Sharciga Iibka iyo Qandaraasyada Qaranka;
  - d. Inay qaadato wixii qalab ama dhaqaale ah ee loogu deeqo si waafaqsan shuruucda dalka u taalla;
  - e. In iyadoo raacaysa Sharciga Shaqaalah Rayidka lagu maamulo ay qorato, shaqadana ka eryi karto shaqaalaheeda; iyo
  - f. In ay kala shaqayn karto ama u idman karto dhinac kale hawlahaa la xiriira hirgelinta nidaamka aqoonsiga si waafaqsan Sharciga Iibka iyo Qandaraasyada Qaranka.

**Qodobka 14aad:**  
**Awoodaha Wasaaradda**

Si waafaqsan Sharcigaan, Wasaaraddu waxay yeelanaysaa awoodaha soo socda:

- 1) Dejinta siyaasadaha guud ee aqoonsiga dadweynaha;
- 2) Ka-baaraandegista iyo curinta shuruucda ay hay'addu u baahan tahay;
- 3) Kor-joogteynta hawlahaa hay'adda iyada oo ku ilaalinaysa qodobbada sharcigan;  
iv. metelaadda hay'adda ee golaha wasiirrada iyo goleyaasha baarlamaankaba.



### **Qodobka 15aad:**

#### **Guddiga Maamulka Hay'adda (Board of Directors)**

- 1) Hay'adda waxay yeelanaysaa Guddi Maamul oo 9 xubnood ah kana kooban Maareeyaha, iyo 8 xubnood oo ka kala imaanaya wasaaradaha iyo Xafiiska Garyaqanka Guud, waana sida soo sooto:
  - a. Wasaaradda Arrimaha Gudaha, Federaalka iyo Dib-u-heshiisiinta, (xubin)
  - b. Wasaaradda Caafimaadka iyo Daryeelka Bulshada, (Xubin)
  - c. Wasaaradda Amniga Gudaha, (Xubin)
  - d. Wasaaradda Isgaarsiinta iyo Teknoolojiyadda, (Xubin)
  - e. Wasaaradda Ganacsiga iyo Warshadaha, (xubin)
  - f. Wasaaradda Maaliyadda, (Xubin)
  - g. Wasaaradda Shaqada iyo Arrimaha Bulshada, (Xubin)
  - h. Xafiiska Garyaqanka Guud ee Dowallada, (Xubin)
- 2) Xubinta wasaarad kasta waxa soo magacaabaya wasiirka ay khusayso, isaga oo kusoo xulaya aqoon iyo khibrad shaqo oo la xiriirta hawlahaa hey'adda.
- 3) Kubnaha guddiga maamulka waxay yeelanayaan gunno uu go'aamiyo Wasiirka.
- 4) Maareeyaha guud ee hay'adda waa guddoomiyaha guddiga maamulka (board of directors). Marka uu maareeyuhu maqan yahay waxaa shir guddoonka qabanaya Maareeye Ku-xigeenka.
- 5) Haddii xubin guddiga kabanaanato waxaa lagu soo buuxinayaa si waafaqsan faqraqdda 2aad ee Qodobkan.

### **Qodobka 16aad:**

#### **Waajibaadka Guddiga Maamulka**

Guddiga maamulku wuxuu u xilsaaran yahay :

- 1) Hubinta iyo ansixinta qorshe hawleedka Ha'yadda kadib marka uu soo gudbiyo Maareeyaha Guud ee hay'adda.
- 2) Dhageysiga warbixinta sanadlaha ah ee hay'adda.
- 3) Ansixinta xeer hoosaadka iyo habraacyada hay'adda.
- 4) Ka-baaraandegista iyo ansixinta miisaaniyadda Hay'adda iyo ansixinta xisaab xirkeeda.

### **Qodobka 17aad:**

#### **Kulamada Guddiga Maamulka**

- 1) Kulmada caadiga ah ee guddiga waxay qabsoomayaan afartii biloodba halmar.
- 2) Guddigu waa in uu kulmaa markasta uu isugu yeero:
- 3) Wasiirka;
- 4) Guddoomiyaha guddiga 3.Guntanka kulamada guddiga iyo go'aanna doodu waxay ku ansaxayaan tiro hal dheeriya (50%+1). Guddoomiyaha wuxuu codeeynayaa kaliya marka ay codadku isle ekaadaan.



- 5) Hay'addu waxay diyaarinaysaa xeer-hoosaad lagu maaraynayo kulamada guddiga, una gudbinaysaa Wasiirka si uu u oggolaado.

**Qodobka 18aad:**  
**Qaab-dhismeedka Maamulka**

- 1) Hay'addu waxay yeelanaysaa:
  - a. Maareeye Guud;
  - b. Maareeye Ku-xigeen Guud;
  - c. Agaasime waaxeedyo; iyo d. Shaqaale.
- 2) Qaab-dhismeedka Hay'adda waxa soo saaraya Maareeyaha Guud, waxaana meelmarinaya Wasiirka.

**Qodobka 19aad:**  
**Magacaabista Maareeyaha Guud iyo ku-xigeenkiisa**

- 1) Maareeyaha Guud iyo ku-xigeenkiisa waxaa soo jeedinaya Wasiirka Wasaaradda Arrimaha Gudaha, waxaana meel marinaya Golaha Wasiirada, kadibna waxaa Xeer Madaxweyne ku soo magacaabaya Madaxweynaha JFS sida ku xusan Qodobka 90aad, Xarafkiisa (K) iyo Qodobbada 99aad ee Dastuurka, isla markaasna waxaa lagu soo saaraya Faafinta Rasmiga ah ee Dawladda JFS.
- 2) Xil-ka-qaadista Maareeyaha Guud iyo Ku-xigeenkiisa waxaa loo maraya habraaca ku cad faqradda 1aad ee Qodobkaan.

**Qodobka 20aad:**  
**Shuruudaha looga baahan yahay Maareeyaha Guud iyo  
Ku-xigeenka Maareeyaha Guud**

Qofka loo magacaabayo Maareeyaha Guud iyo Ku-xigeenkiisa waa in laga helaa shuruudahan soo socda:

- 1) Inuu yahay muwaaddin Soomaaliyeed Muslim ah.
- 2) In dhimirkiisu fayow yahay;
- 3) Inda'diisu aanay ka yarayn 30sano;
- 4) Inuu haysto shahaado heer-jaamacadeed;
- 5) Inuu leeyahay waayo aragnimo shaqo oo aan ka yarayn (5) sano, khibradna u leeyahay maamulka iyo maaraynta;
- 6) Inaan si kama danbeys ah maxkamadi ugu xakumin danbi 5tii sano ee ugu danbeeyse.;

**Qodobka 21aad:**  
**Xil-Waayidda iyo shaqo ka joojinta Maareeyaha iyo Ku-xigeenkiisa**

- 1) Maareeyaha Guud iyo ku-xigeenkiisa Xilka waxay kuweyn karaan:
  - a. Xanuun xagga dhimirkha ah uu soo caddeyo dhakhtar lagu kalsoon yahay;



- b. Geeri;
  - c. Xil-gudasho la'aan si waafaqsan habraacyada waajibaadka shaqo ee hay'adda.
  - d. Dembi-ciqaaheed ay soo caddeysay maxkamadda awoodda u leh; iyo
  - e. Iscasilaad laga aqbalay.
- 2) Wasiirku wuxuu shaqo-ka joojin ku samayn karaa Maareeyaha ama ku-xigeenkiisa sababaha soo socda dartood;
  - 3) U hoggaansamid la'aan faritaanada kor-joogteeneed ee Wasiirka si waaafaqsan sharcigan; iyo
  - 4) Ku xadgudubidda sharcigaan, xeer-nidaamiyealkiisa iyo shuruucda kale ee dalka.

**Qodobka 22aad:**  
**Awoodaha Maareeyaha Guud**

Awoodaha Maareeyaha Guud waa sida soo socota:

- 1) Dejinta, lasocodka, hirgelinta iyo kormeerka qorshaha shaqo ee Hay'adda;
- 2) Diyaarinta qaab-dhismeedka iyo habraacyada lagu socodsiiinayo hawlahay'adda;
- 3) Diyaarinta miisaaniyad-sanadeedka Hay'adda;
- 4) Qoristaiyoxil-ka-qaadistashaqaalaha Hay'adda si waafaqsan Sharciga Shaqaalaha Rayidka; iyo
- 5) Matalaadda Hay'adda dhinaca Sharciga iyo gelista heshiisyada.

**Qodobka 23aad:**  
**Xilka Ku-xigeenka Maareeyaha Guud**

Ku-xigeenka Maareeyaha guud wuxuu u xil saran yahay:

- 1) Qabashada xilka Maareeyaha Guud marka uu shaqada ka maqan yahay; iyo
- 2) Qabashada wixii hawl kale ee Maareeyaha Guud si gaar ah ugu igmado.

**Qodobka 24aad:**  
**Agaasinnada iyo howlwadeennada Hay'adda**

- 1) Hay'addu waxay yeelanaysaa Agaasin waaxeedyo hoggaamiya waaxaha Hay'adda.
- 2) Hay'addu waxay shaqaalaysiinaysaa howlwadeenno iyo shaqaale ku kaalmeeya fulinta howlaheeda iyo xilkeeda.
- 3) Qorista, shaqo-gelinta, anshax-marinta iyo shaqo ka saaridda agaasimeyealka, howlwadeennada iyo shaqaalaha kaleba waxaa loo waafajinaya Sharciga Shaqaalaha Rayidka.
- 4) Hay'addu waxay kaloo yeelanaysaa laamo iyo faracyo ka hirgeliya hawlaheeda dhulka Jamhuuriyadda Federaalka Soomaaliya.



### **Qodobka 25aad: Dhaarta Xafiiska**

- 1) Xog-dhigista waa inay taallaa xarumaha Hay'adda ee dalka gudihiisa ah, waxaan ka reeban in lagu hayo ama la geeyo meel ka baxsan xarumaha rasmiga ah ee Hay'adda, dadka gacanta ku hayaana waa in ay yihiin dad Soomaali ah oo la dhaariiyey, lagana saxiixay qoraal.
- 2) Shaqaalahay Hay'adda ee u xilsaaran maamulka xogta inta aysan billaabin shaqada loo igmadey waa in Maareeyaha Guud hortiisa iyo Guddiga Shaqaalahay Rayidka ay ku maraan dhaarta ilaalinta xogta dhawrista u baahan ee Hey'adda, waana in laga saxiixaa heshiis xog-ilaalineed, loona caddeeyaa cawaqaqibta ka dhalan karta bixinta xogta dadweynaha.
- 3) Dhaarta lagu xusay faqrada hore ee qodobkan ma beddeleyso dhaar kale oo Sharcigu ku waajibiyo shaqaalahay.
- 4) Waajibaadkii ay dhaartu saartay qofka shaqaalahay ka ah Hay'adda, kama dulqaadeyso xitaa haddii uu shaqada uga tago hawl gab awgeed ama sabab kasta oo kale.
- 5) Habraaca dhaarta iyo xog-ilaalinta la xiriira waxaa si faahfaahsan loogu soo saari doonaa Xeer-nidaamiye Hay'adda.

### **Qodobka 26aad: Miisaaniyadda Hay'adda**

Hay'addu waxay yeelanaysaa misaaniyad u gaar ah oo ka imanaysa:

- 1) Miisaaniyadda guud ee Dawladda Federaalka Soomaaliya;
- 2) Dakhliga laga helo adeegyada ay Hay'addu fuliso waxaa loo maraya si waafaqsan habraaca Sharciga maamulka maaliyadda ee Dowladda Federaalka Soomaaliya;
- 3) Kaalmada miisaaniyadeed ee laga helo deeq-bixiyeyaasha gudaha iyo dibadda si waafaqsan habraac maaliyadeedka Dawladda.
- 4) Maareeyaha Guud ee Hey'adda waa in uu sanad walba ugu dambeyn 30ka Oktoobar uu diyaariyaa qorshaha Miisaaniyad-sanadeedka Hey'adda, taasoo muujineysa dhammaan kharashka iyo dakhliga ee la filayo, una gudbiyo guddiga maamulka, ka dibna Wasaaradda Maaliyadda ee XFS.

### **Cutubka 4aad: Qoobbo Qubane Ah Qodobka 27aad:**

**Xeer-nidaamiyeyaa, habraacyo, iyo xeer-hoosaadyo**

- 1) Wasiirku waxuu awood u leeyahay in uu soo saaro xeer-nidaamiyeyaa faahfaahinaya qodobbada sharcigan.



- 2) Hay'addu waxay awood u leedahay soo saarista xeer-hoosaadyo iyo habraacyo ay ku fulineyso howlaheeda oo aan ka hor imaanayn Sharcigaan iyo xeer nidaamiyealkiisa.

**Qodobka 28aad:**  
**Faldambiyedyada La Xiriira Diiwaangelinta iyo Aqoonsiga**  
**Dadweynaha**

- 1) Qof kasta oo ku kaca arrimaha soo socda wuxuu galayaa dembi uu ku muteysanayo ciqaabta ku qoran faqradda 2aad ee Qodobkan:
  - a. Bixinta hor-xog aan run ahayn ama sheegasho qof uusan ahayn xilliga diinwaangelinta.
  - b. Ka hor istaagga qof xaq u leh in uu qaato tirsiga iyo kaarka aqoonsiga
  - c. Isku day sameyn kaarka aqoonsiga si aan sharciga ahayn.
  - d. Sameynta nuql been abuur ah ee kaarka aqoonsiga
  - e. Iisticmaalka iyo haysiga kaarka aqoonsi qof kale leeyahay.
  - f. Ka been sheegid diinwaangelin hore loo sameeyay
  - g. Isku day isdiinwaagelin mar labaad ama in ka badan.
  - h. Baahinta ama la wadaagista xogta diinwaangelinta qof kale oo aan shaqo ku lahayn.
  - i. Ku kicista khiyaano kasta oo la xeriirta aqoonsiga iyo diinwaangelinta
  - j. Dhammaan faldambiyedyada la xeriira been-abuurka dokumenti ee xeerka ciqaabta soomaaliyeed.
- 2) Qof walba oo faldambiyedyadan ama kuwa la mid ah gala waxaa lagu qaadayaa xeerka Ciqaabta Soomaaliyeed.

**Qodobka 29aad:**  
**Danaha Iska Hor-Imaanayo**

Qofna xil kama qaban karo, mana sii joogi karo hay'adda, ha ahaado xubin Guddi Maamul ama shaqaale, haddii ay jiraan dano iska hor-imaanaya si waafaqsan habraacyada shaqo ee hay'adda.

**Qodobka 30aad:**  
**Burin**

Sharci kasta oo ka hor imaanaya ama aan la socon karin qodobbada Sharcigan waa la buriyay.

**Qodobka 31aad:**  
**Dhaqangal**

Sharcigan wuxuu dhaqangalayaa markuu ansixiyo Baarlamaanka Federaalka Soomaaliya uuna saxiixo Madaxweynaha JFS laguna soo saaro faafinta rasmiga ah.

